

## 2 CORINTHIANS

*Paul na ahari erevi da Corinth embomeni ta degi kajena.*

<sup>1</sup> Na Paul Iesu Keriso ta apostel ana God na siriketo umbuna, amite ungotenau namei Timothy na ungo God ta ekalesia da Corinth embomeni te eto ungo enda Achaia embomeni ototohu tapa amita degi ahari erevi ere kajihera.

<sup>2</sup> Eto ungotenau Mama God te eto Bada Iesu Keriso te amita hondate ari te peka te ungota degi iresuja.

*Paul na God osa ue jakeka ena*

<sup>3</sup> Eto ungotenau jo ari ta Mamo God amita degi ta eto hondate ari tapa puvaguja avoeto ungotenau Bada Iesu Keriso ta Mamo God avo osa be ue jakeka erera. <sup>4</sup> Eto amina ungotenau osaga tapa avo kogue hondate uoi mine ungotenane hondate ari God ta degi humbagora avo jigama ue embo nei ta osaga neite neite avo kito hondate eagora <sup>5</sup> eto amita ke be amo Keriso na osaga peni vahai kina ainge dombo ungotenanena koguore Keriso na ungotenau tunga jamo ari mine avo ikeoi humbagora <sup>6</sup> eto dagona osagate memengate embota ingeni ta kogue mihera amo God na ungota ari sasapura avo oreketo humbuto tunga jamo ari ta ikaguja amita ke ungota degi hande ere ora avoeto kogue mihera. Eto dagona tunga osaga kiari ijite tunga jamo ari ere humbuhora avo ungonu tunga jamo ari

ere humbuhava avoeto ungotena tapa na tunga osaga humbari haite aisora. <sup>7</sup> Eto unгона osaga te memenga te kogue miheva avoeto dagote tapa God ta degi kekota ari ere humbuhava avo dago na ere kogora avoeto ungotena tapa do humota ue mihera avo humbasora. <sup>8</sup> Eto dagota namei kamei, ungo be kiagova uje ere ora amo eto dago enda Asia ta mihie bouka peni vahai umbua amo dago oenga humbari haite mane rate embo na tea amo pehari ahumpa ea <sup>9</sup> amo dagota sari ari ta duru avo humbuto arako ere ua ehera avoeto aita kehera amo sovera dagota avo humota mane aisora te God ambure embo jigeoi vasiri te eraguja embo vahai avo humota ere uahera. <sup>10</sup> Eto ari sapura be avo kia te God na ari avo kito dago oreketo umbuna avoeto dago ke be erera amo amina mahainge orekasuja <sup>11</sup> ari ainge avoembo jo vahai eto dago embo pari evujo. Eto unгона pari ijirovo God na dago orekihirou ungo embo isapamane na dago kito osa aisova.

*Ke be ari ta ke.*

<sup>12</sup> Eto ke erevi ke be pere avoeto tunga javo-toho ue ungota degi erera amo enda embo tapa ta degi ari tapa do eagora amo ke sokova na ae rate ke be ari te ke otohu ari te God ta degi puvaguja amina eagora, amo enda embo ta kiari sokova na ae rate God na hondate uoi eagora. <sup>13</sup> Eto dagota ahari kajari aita amo ke ojikari irae rate ke araha ta pere unгона eheketo kiari haite avo pere kajagora. Avoeto na uje ere ona amo <sup>14</sup> unгона dago be kogue hamo ere uma Iesu ta puvurari iji puvurou ungotenane javo mine kaha ue amita

tihi ta hetasora. <sup>15</sup> Eto unгона dago hamo ueva avo ke be hotembihe hae heriso ungota degi pambasi uje uena amo <sup>16</sup> enda Macedonia ta pambasi pambuto ungota da aita heteto umoro eto pambuto egerembeto Judea ta pambasi ue ungota umoro ehako asi aita hetasi uje uena. <sup>17</sup> Eto na ainge aisi hotembihena te tohena avo unгона na jo heriso ue ari ke eagovete? Eto enda embona aisona ke aisuja te ambota amo mane aisuja ke ainge avo dago na ari ke erevete? <sup>18</sup> Eto dago God ta ke be na ungota degi erera amo dagona hotembari heriso, jo heriso na ungota degi ke ae rate <sup>19</sup> God ta Meni Iesu Keriso amita ke avo namote Silas te Timothy te na ungota degi hande uera aita ke nei mane hambasova te ke vahai amina heteto mahainge iresuja. <sup>20</sup> Eto God na ke isapamane embo ta degi oje ereua amita ke be tapa amo Iesu ta degi hambasora avoeto amita ke avo ke be ijie embota degi hande uore jakeka ari te pekari te God ta degi puvaguja. <sup>21</sup> Eto eha emo God na oi ungotena tapa Iesu Keriso ta jo ta heteto mihera. Eto amina amita Ahihi Otohu ungotenau jo ta overekena <sup>22</sup> amo ungotena Iesu Keriso ta toho amita hajire embo na kiagora overekena avo ungotena kogue ambota do puvourou kesora avo ke be erera.

<sup>23</sup> Eto na ungota da Corinth ta pambae tohena amita be avo ano ingivujo, amo unгона nau ke ngahia avo eagone ingito unгона osaga kiagova avo hotembeto pambae tohena avo God ta tihi ta erena. <sup>24</sup> Eto ungota God humota ari avo dagona tihi jigesu ae rate ungo God humota ue heteto

miheva avoeto ungo daingeto tunga javotoho ue iresova avo ungote namote tapa na jombure ereora.

## 2

<sup>1</sup> Avoeto ke erena amo ungo osaga kiagora na ungota degi pambae <sup>2</sup> amita be amo nanena ano ungo osaga kogurovo amo embo nei amuna au na tunga javotoho ano? Na tunga javotoho ari embo nei irae. <sup>3</sup> Eto na ungota degi ke ngahia na kajihena amita be amo na ungota degi pambae kihi ta unгона ke avo tambu au teho mihirovo pambuto ungota tunga javotoho ari avo kiaehena. Eto na kogona amo na tunga javotoho ururono ungote tapa tunga javotoho aisova. <sup>4</sup> Eto na ungota degi ke ngahia kajihena amo tunga osaga te tihi sisivu te tapa kajihena te amo ungo osaga kiagova na kajae rate ungo osa peni vahai eagona avo unгона be kiagova kajihena.

*Embo na enu osaga kia avo hotembeto toari ta ke*

<sup>5</sup> Eto embo vahai na enu osaga kogueva amo nau degi ta ae kiae rate amita ke na enu ungo osaga isapa kogue mihovova. <sup>6</sup> Eto amita ari sapura ta hajire amo ungo embomeni isapamane na eheve ere kogua amo inonora <sup>7-8</sup> avoeto amita ari avo hotembeto toto embo ehako humbuto osa ururoro amo osaga isapamane kogue mane veto pambasuja. <sup>9</sup> Eto na ungota degi ke kajihena amo ungo na ke tapa inono ta agi avote avo be kesi kajihena. <sup>10</sup> Eto unгона embo ta ari sapura hotembeto toasova amo namote tapa hotembeto

toasona. Eto ari sapura mihirou hotembeto toasona amo ungo avoembo Keriso ta tihi ta hotembeto toasona. <sup>11</sup> Amo Satan ta sovera na mane dembasuja avoeto eagona, eto amita uje deire amo ungotena tapa kiarira.

*Paul na da Troas ta mihie osaga kina.*

<sup>12</sup> Eto na da Troas ta pambuto mihio Bada na degi enu kito Keriso ta duru javotoho avo embomeni ta degi hande ue <sup>13</sup> nau namei Titus da aita hambae ue nau jota osa ari puvurae enu embomeni peketo toto Macedonia ta pambuhena.

*Ungotena Keriso avoembo ari sasapura dembari embopora*

<sup>14</sup> Rate degi dainge dainge pambasora amo God na eoi Keriso ta ari sasapura dembari embopo ue amiga kajuetu pahue amita ke javotoho embo tapa ta hande eagona, amo ji vuji javotoho na mune javotoho hande eaguja aingeko eagona. <sup>15</sup> Eto ungotena Keriso ta embomeni amo God ta degi jeune mune te aingeko eto God na oreketo humbasuja eto oreketo umbae toasuja embomeni enana amo mahu munehembagora. <sup>16</sup> Eto Keriso ta ke oreketo umbae embomeni ta degi amo visi sari kimu masa te aingekora te oreketo humbasuja embomeni ta degi amo jeune mune te aingeko aita amo vasiri be hambuto iresora. Eto Keriso ta pure dombo be emo embo amuna ari haitere? <sup>17</sup> Eto ke be amo embo nei nei na God ta ke embota degi koro na ombuto humbagora te dagona amo ainge aera te dagona

Keriso ta ke hande ue God ta ke hande ari embopo ke ijie God ta tihi ta ke be na pere erera.

### 3

#### *God ta ke eha ta agi ari embopora*

<sup>1</sup> Eto ke ere kajihera emo unгона dago ke be ava kajari ke ijie ere hotembihevete? Eto enana ke sokova ijie ahe poekari embomeni na eagora ainge dagona popoja na kajagora ainge mane kajasora <sup>2</sup> amita be amo embomeni na ahari mane ehekasora te ungota vasiri kogue dago Keriso ta pure ari embo be avo ke be aisora.

<sup>3</sup> Eto ahari be amo Keriso na ungota hotembari jo ta kajena amo unгона dagota ke avo be ijie humbuheva te ke amo ongo na kajae rate God ta Ahihi vasiri te na kajarira. Eto ke amo God ta ke 10 koro hamota kajena aingeko mane rate ungota hotembari jo vasiri te aita kajarira.

<sup>4</sup> Eto dago ke erevi erera amo jo ta segigi ae rate Keriso avoembo God ta tihi ta ke be na erera

<sup>5</sup> eto pure emo dago oenga ari ke mane eagora te God ta degi ke te pure ta sovera ari te puvaguja

<sup>6</sup> avoeto God na enu dago God ta noma eha ta kajari amita ke hande ari embopo ereora eto God ta noma eha kajari amo ingeni na ahari ae rate Ahihi Otohu na ke ikarira. Eto ke mahu kajena aita amo embota Ahihi pehari puvuna te ke eha ikari ai ta amo Ahihi Otohu na ahihi ta vasiri ikaguja.

<sup>7</sup> Eto ungo be hotembevujo. God ta ke pepeni koro hamota kaeto ikihinu Moses ta tomбу usasa pajire be unu Israel embomeni na avo kiari inono ae ea te ke ikari aita embomeni na ke

avo hatikea avoeto ahihi pehari hambua avoeto ke amita usasa irae ena. <sup>8</sup> Rate Ahihi Otohu ta ke eha ikari aita usasa pajire be kogora amo ke kihi ikari ainge manera. <sup>9</sup> Eto ke erena amo ahihi tari pehari amita ke ikari aita amo usasa isapa kogora te ahihi ta degi vasiri eha ikari amita ke eha puvija aita amo usasa pajire be ere kogora. <sup>10</sup> Eto usasa eha puvija amo pajire be pajire amina ke mahu Moses ta degi ikari amita usasa amo mahu peikehei irae ehija. <sup>11</sup> Eto ke kihi puvuna amo usasa ga tapa puvuna te amita usasa irae ere ua te usasa eha puvija amo daroho iresuja.

<sup>12</sup> Avoeto ungotena vasiri te daroho irari embomeni na nei do joru mane aisora <sup>13</sup> te Moses tiri i ta eto vovue amo Israel embomeni na amita tomбу ta usasa irae ere ua avo kiagora uje ae ue tomбу ahurekena. <sup>14-15</sup> Eto nei amo enana ta siro ngahia unu ke ehekenu ingito ingae sira ere uahera avo embo eha oroho amo enana God ta ke Moses ta degi mahu ikari avo ehekihore ingae ere ovora te Keriso na enana ta siro hirikari inonora <sup>16</sup> amita be amo enana ta siro ngahia mane irae aisuja te jo ahereketo Bada ke be aisora iji amite amo siro ngahia ari amo irae aisuja. <sup>17</sup> Eto Bada amo Ahihi avo eto Bada ta Ahihi iresuja degi ai ta amo embo ta Ahihi ari sapura na andirari avo iraera. <sup>18</sup> Eto ungotenau tomбу amo nei deina togae eto andirae avoeto siro ngahia ungotenau degi ta irae rate ungotenau tomбу ta amo Bada ta usasa mihia, avoeto Bada ta Ahihi ungotenau jo ta mihie pure ururou ungotenau degi ta usasa

pajihirou Bada ta tombu vahai aisora.

## 4

*God ta usasa amo ungotenau sari ari hamo ta mihia*

<sup>1</sup> Eto God na amita jo ari na Keriso ta ke hande ara pure ikena avoeto jo segigi ae pure sovera eto eagora. <sup>2</sup> Eto enana ke sokova ahe poekari embomeni ainge mane dago God ta ke ojikari na hande mane eagora te God ta ke popoja na ae rate araha ta God ta tihi ta hande uore hotembari embopo na ingito ke be eagora. <sup>3</sup> Eto God ta ke amo embo tapa ta degi ojikae rate enana Ahihi pehari degi ta ere pahora amita degi amo ojikarira <sup>4</sup> amita be amo God ke be ae embomeni na Keriso amo God ta ari eto hajire vahai amita ke javotoho usasa te avo mane kiagora enda emita tihi jigari embo sapura na enana ta tihi ta kajehei kuru ehija. <sup>5</sup> Eto ke hande ere ora amo ke dagota mane rate Iesu Keriso amo ungotenau Bada eto tihi jigari embo eto dago amo Iesu avoembo ungota undurari embopo ra amita ke avo hande ere ora. <sup>6</sup> Eto iji ihikarita God na mume ta degi “Usasa e” ijinu usasa ena eto God na vahai dagota uha avo usasa amita na hirikenu kia amo God ta usasa Keriso ta tombu ta gain ena avo kia.

<sup>7</sup> Eto ari javotoho be usasa te God na ikena amo ungotenau sari ari hamo ta mihia avoeto ungotena ere kogora amo usasa javotoho emo dago na ae puvurae rate God na hande ikehija. <sup>8</sup> Eto degi tapa ta kitoho mihia amina dago dembari inono ae eto osaga isapamane ere kogora



te toae. <sup>9</sup> Eto embomeni na teore memenga kiagora te God na dago toto pambae eto teore enda ta veagora te dago pehae. <sup>10</sup> Eto degi dainge pambagora amo dago ta sari ari hamo na Iesu ta osaga te memenga te amina ahe kihira ere ora, amo dagota hamo avo embomeni na kogoue Iesu ta vasiri avo hotembagora. <sup>11</sup> Eto ke be amo dago pehae mihie Iesu ta pure ere ora avoeto dagota pehari amo iji mahainge puvutuhoi hotembagora, eto dagota vasiri aita amo embomeni na Iesu ta vasiri kiagora. <sup>12</sup> Eto ke erena amo dago pehasi era pahora te unгона dagota pure avoembo vasiri te daroho iresova.

<sup>13</sup> Eto God ta ke ta amo ke einge kajari mihia “Na ke be erena avoeto ke hande ere ona” ke ainge mihia avoeto amita ari vahai amo dago na eagora avoeto ke be ijie God ta ke amo embo ta degi hande ere ora. <sup>14</sup> Eto dago kogora amo Iesu jiginu vasiri te erena embo God na iji inono ta dago Iesu ga tapa jigou vasiri te erihiroro ungote tapa humbuto Iesu ta engihita ikau hetasora. <sup>15</sup> Eto ungo kogova amo osaga memenga ere kogora amo ungo avoembo ere kogora amo aita God ta hondate ari isapamane na embo ta degi pahurou embo isapamane na God osa ue jakeka ijiroro usasa God ta degi pambasuja.

*Enda ta uhu ta irari amita ke*

<sup>16</sup> Eto ari ainge avo dago joru ue pure mane toasora. Eto dagota hamo amo sari asi ere pahua te jo ta amo iji vahai vahai ainge God ta degi sovera mine ere humbuhora. <sup>17</sup> Eto dago enda eita mihie osaga isapa ere kogora amo usasa

pajire be daroho ta kesora ainge mane isapa be ra <sup>18</sup> avoeto dago na enda ta sari ari donda tihi na kiari haite amo kon eto kiae rate tihi na kiae donda daroho iraguja avo kon eto kogue eheheto ere pahora.

## 5

<sup>1</sup> Eto ungotena ere kogora amo ungotenau hamo te visi te amo iji tuho irari donda pure horoma aingeko avo irae au God na ungotenau irari bande nei embo ta ingeni na ae teho irerembari uhu i ta iraguja avo ikau humbuto daroho iresora. <sup>2</sup> Eto ungotena enda ei ta mihie amo uhu ta irari donda avo humbuto asukasi uje ue bija puri ue simba ue mihera. <sup>3</sup> Eto ungotenau hamo te visi te irae ahihi pere na mihiroro amo Keriso na hambaute avo ungotena joru ere ora <sup>4</sup> avoeto ungotena enda ta iji tuho irari hamo ga mihie avo houkari uje ae ue bija puri eagora te daingeto daroho irari donda humbuto hamo ta asukaehera avo hotembagora, amo hamo visi te amiga tapa uhu ta pambuto iresi uje ere ora. <sup>5</sup> Rate ari ainge ara God na ungotena ove ena amo daroho irari hamo ikau humbasi simba ue mihera amo God na ikasi oje ena amita hajire amo ungotenau jo ta Ahihi Otohu ikena iraguja. <sup>6</sup> Avoeto ungotena Bada ta irari degi ta irae enda ta hamo te visi te ga irari iji te Ahihi Otohu avoembo sovera ari humbuto mihie <sup>7</sup> teho tihi na kiari avo ae rate God humota ari na iragora. <sup>8</sup> Eto enda eita mihie ungotenau hamo te visi te avo toto pambuto ungotenau da be Bada ta degi pambuto iresi uje eagora te hamo

ta sovera ari humbuto mihera <sup>9-10</sup> eto ungotena tapa na iji tutumota pambuto Bada ta tihi ta heteto mihiroro amina ungotenau ari tapa penite isapate enda ta mihie ere uahera avo siriketo hajire javotoho te sapura te ikau kesora avo eto ari avo hotembihe, ungotenau hamo iroutemo irae au amo ke peni be mane rate dombo be amo ari deina ururoro Bada na kito osa aisuja ari avo perekari eagora.

*God ga peka humbagora amita ke.*

<sup>11</sup> Eto Bada joru eagora avoeto embomeni na ke ingito jo haperekarote avoeto enana ta degi Keriso ta ke hande eagora. Eto dagota jo amo God na ere kogua te ungotē tapa dagota jo kiagova uje ereona. <sup>12</sup> Eto ke erevi erera amo ungonā dago ke be ava ke ae rate enana ungo oenga embo peni ke ijie embota jo avo hotembae ue ahe poekari sokova embomeni amita degi ke mine ava erera, amo dagota ari be avo ungonā kito tunga javotoho ue ke mine enana ta degi aisova. <sup>13</sup> Eto dagota ke erevi ehēketo kogue dago uha sapura ari ke ijie ere hotembiheva te God avoembo ere ora te dagota ke amo ke be ere hotembiheva amo ungoembo ere ora. <sup>14</sup> Eto Keriso ta osa ari peni vahai avo hotembihe haha puha eagora. Eto osa ari aita ere kogora amo embo vahai na embo tapa avoembo pehena te pehae toaehija amo embo tapa na pepehekaehera. <sup>15</sup> Eto amina embo tapa avoembo pehena avoeto embo na enda ta vasiri te irari iji te enana ta hamo ta ujeje neite neite avoembo mane iresora te embo

enana embo peheto vasiri te erena amita uje avo asi iresora.

<sup>16</sup> Avoeto iji eha eto ambota amo dago na enda ta hotembari na embo ari javotoho te sapura te avo mane sirikasora. Eto dagona Keriso enda ta mihinu amiga isa ue enda ta hotembari avo ere uahera te eha emikote ari ainge avo iraera <sup>17</sup> te embo amuna Keriso ta jo ta mihia amo ove eha ari ra te embo kihi enda ta vasiri na ari amo irae ehei ove eha ari avo pere mihia. <sup>18</sup> Eto ari amo God na eaguja amo mahu kihita ungotena amita kitoho rate Iesu Keriso ta pehari na peka humbuto peka humbari ta ke amo dagona hande ara ikena. <sup>19</sup> Eto ke erena amita be amo God na Iesu Keriso ta pure amina enda embomeni tapa ta degi peka humbuto enana ta ari sasapura avoeto kitoho ari ehako mane hotembasuja, eto duru javotoho erevi dagona hande ara ikena. <sup>20</sup> Avoeto dago Keriso ta ke hande ari embopora, amo God na pe dagota na embomeni ta degi ke eria avoeto Keriso ta javota erera amo ungo God ga peka umbuvujo. <sup>21</sup> Eto God na ari sapura irae embo Keriso ta degi embomeni ta ari sasapura tapa overekena avoeto ungotena amita jo ta mihera avoeto God na Keriso ta ari jajavotoho perekari avo ere kogua.

## 6

<sup>1</sup> Eto dago God ta pure vahai embopo na ungo ari erevi ava erera amo ungo God ta hondate ari humbuheva avo be ambu ainge aja avojo <sup>2</sup> amo God na amita ke einge enu kajena “Eto na ungo kehene jo ehija iji te amo na ungota pari ingena

eto ungo orekehena ijite amo na ungo hondate ehena”, ke ainge kajari mihia avoeto erena amo God na ungo jo ururou oreketo humbasuja iji amo eha oroho erevira.

<sup>3</sup> Eto embo na dagota pure kito eoi sapura eaguja avo hotembihe dagota ari nei eagore embo hini kambari eagora ari avo mane eagora, <sup>4</sup> te ari tapa avo dago God ta ke agi ari embopo na ari avo embo na kiagora eagora avoeto osaga kiari iji te amo hamo ta sovera ari humbuto ngahia eto bouka humbari te, <sup>5</sup> hamo ta tari te, tipura ta gosukari te, embomeni na ereto ejembeto tari te, pure ngahia ari te, evo ae ari te, beuje te tapa amo sovera ue kiagora. <sup>6</sup> Eto embomeni na dago God ta pure ari embopo be kiagora dagota ari amo tongopa irae, hotembari javotoho ue, sausau ereto mane tumo eagora te embomeni tunga humbuto Ahihi Otohu ta ke be ari na embomeni osa eagora. <sup>7</sup> Eto God ta sovera humbuto amita ke be na ijie God ta isoro ari donda ingeni be ta eto anga ta jigito nununga ue mihera amo javotoho ari avo jigito mihera. <sup>8</sup> Eto dago nununga ue embona dagota javo otohu arote sapura aro, jakeka arote pehumba aro, dago ke be arote ke sokova aro avo tapa kesi nununga ue mihera. <sup>9</sup> Eto embomeni na dago kiari rate kiae ke ko eagora. Eto dagota hamo mahu pehari rate vasiri te mihera, eto embo na mahu tari pehari ke eagora te vasiri te mihera. <sup>10</sup> Eto dago tunga osaga ere kogorate tunga osa osa ue mihera eto dago ta degi donda irae rate embomeni isapamane na dagota degi ta donda ere humbuhora eto dagota hajae vajae irae rate

dagota degi hajae vajae isapamane be mihia. <sup>11</sup> Eto da Corinth embomeni ungo ke erevi be ingova hariketo ke araha ta erera. <sup>12</sup> Eto dagona ungo jo tapa na osa ere ora te ungoni jo tapa na dago osa mine ae <sup>13</sup> avoeto nau meniundi ungota hande mine inono ta ue jo tapa na osa evujo.

*God kiae embomeni ta ari avo toara Paul na ena.*

<sup>14</sup> Eto ari jajavotoho te ari sasapura te vahaita iresuja amo sapura, eto ainge dombo usasa te mume te na vahai ta mane iresora avoeto God kiae embomeni ga kaju avojo. <sup>15</sup> Eto ungo kivujo Keriso te Satan te na tunga vahai ari inono rete? Ainge mane avoeto God ke be ari embo te God ke be ae embo te na tunga vahai ari inono aera. <sup>16</sup> Eto God ta bande Otohu aita amo God sokova ingeni na ari mane hambasora eto ungotena amo God ta bande otohura. Amita ke amo God na einge kajena “Eto embomeni nau amina nau irari bande ururoro na aita iresona, eto na enana ta God ururono enana embomeni nau aisora”. <sup>17</sup> Ke ainge ena eto Bada na ke nei einge ena “Ungo oenga iresi ue sasapura embomeni toto pambuvujo. Eto donda tapa tongopa te avo toto teho irirovo na ungo humbuto <sup>18</sup> ungota Mama ano ungo nau meniundi aisova, ke amo na Bada sovera isapamane te nanena erena”.

## 7

<sup>1</sup> Avoeto nau namei kamei, God na ari erevi ungotenau degi ta asi oje ena avoeto ari tapa deina ungotenau hamo te ahihi te tongopa eaguja

avo toto God Otohu ke ijie joru ue embomeni jajavotoho jo tapa na asi tunga iketo pure aisora.

*Paul na osa ari ta ke ena.*

<sup>2</sup> Eto dago tunga humbuvujo. Dagona ungota embo vahai amita degi ari sapura ae, embo ta javo sapura ae, ke gamo na poeketo nei do umbae eto sapura ta kihi umbae. <sup>3</sup> Eto ke erena amo ujekari ungota avo ke ae rate ke mahu ijiena amo eto dago peharote teho iroro avoeto ungo osa mahainge aisora. <sup>4</sup> Eto na ungo humota ue javo ungota avo jakeka ijie ere ovona. Eto dago memenga kogue mihera te na ungo hotembihe sovera ari humbuto tunga javotoho ereona.

<sup>5</sup> Eto dago enda Macedonia ta pambuto aita jangu indari avo hambae be rate hamota memenga te hini kambari te joru te tapa avo koguera. <sup>6</sup> Rate God amo ungotenau tunga javotoho ikari embo amina Titus ikenu puvunu kito osa ue tunga javotoho uera. <sup>7</sup> Eto tunga javotoho uera amo Titus puvei kehera avo pere mane rate ungota pekari te undurarite avo puvuto ehei ingito osa uera. Eto ungoni tunga osaga te si te tapa ijie na hotembeto ehako kesi uje ere ova avo ehei ingito tunga javotoho be uena.

<sup>8</sup> Eto ke erena amo na ahari mahu kihi ungota degi kaeto ikihane humbuheva avo humbuto ehaketo osaga kogueva avoeto namote tapa osaga koguenta te oroho amo osaga mane kesona te tunga javotoho ereona, <sup>9</sup> amita be amo nane one osaga kogueva avoembo tunga javotoho ae rate ungo osaga kito jo haperekehei ajato ijieva avoembo tunga javotoho ere ona, eto

amo God ta uje avoeto osaga kogueva, avoeto dagota degi sapura nei do hambae ueva. <sup>10</sup> Eto erena amo God na au embona osaga kito jo haperekau oreketo humbasuja te enda ta ari sapura na au osaga kogue ere uma amita ahihi amo pehasuja. <sup>11</sup> Eto unгона osaga keheva amo God na ikena avoeto keheva te ungo be kivujo, amita tutumota amo unгона jo tapa na embo jajavotoho asi ue ungota ari avoembo ajato eto namote namei eto ehako osa ue ke avo tambu aja uje isapamane ereova avo kogue ungo pehumba ari haite ae kogona. <sup>12</sup> Avoeto ungo na ingova uje ereona amo ahari kajihena, amo ari sapura embo avoembo kajae, eto ungota degi ari sapura uija avoembo kajae rate unгона dago osa eagova avo do aingere avo unгона God ta tihi ta be kiagova kajihera. <sup>13</sup> Eto unгона dago humota ue osa isapamane ereovova avo dagona kito sovera ari umbera, amite eto ungo na ove Titus na kito tunga javotoho be eto puvuto ehei ingito dagote tapa tunga javotoho be ehera. <sup>14</sup> Eto na ungo osa kageni ue Titus ta degi ke ijiena avoeto amina ungota degi pambuto dagota ke ungo avoembo ijiera amo ke be pere avo koguija eto ainge dombo dago ke do ungota degi ta eagora amo ke be pere eagora. <sup>15</sup> Eto Titus na ungota degi pambuto ke ijinu ingito joru te tapa agi asi ueva avo koguija, avo eto amita osa ari ungota degi avo pajito peni vahai be ere ua. <sup>16</sup> Avoeto na kogona amo ungo iji tapa amo ungota hamota ra avo eto osa pajire be ere ona.



## 8

### *Hande ikari ta ke*

<sup>1</sup> Eto nau namei kamei, God na enda Macedonia ta ekalesia ta hondate ari isapamane ikehija avo ungo ano ingova uje ereona. <sup>2</sup> Amo enana ta degi memesi peni vahai be puvuna amita mine amo osa ari peni vahai be pajina avoeto enana amo haja vaja embo mane rate hande embopo ere ora. <sup>3</sup> Avoeto God ta tihi ta erena amo enana hande ikari haite donda avo pere ikae rate nei amita hamota avo jo tapa na hande ikihara <sup>4</sup> amo enana ta uje na God ta embomeni hondate aisi dagota degi penunu kaiketo ijiera <sup>5</sup> eto amita tutumota amo enana ta hamo te tapa God ta degi ikihe amita pure asi dagota degi ikihara avo dago kito kore uera.

<sup>6</sup> Eto enana ta ari avo kito ungotetapa na hondate ari ikavote avo kesi Titus ikaro pambuto ungota degi pure jua mahu ihikihaja avo au irae aisuja. <sup>7</sup> Eto na kogona amo ungota degi ari tapa inono mihia, amo God humota ari, ke hande ari, ke kiari, jo tapa na hondate ari, dagota degi osa ari te tapa amo ungota degi inono bera avoeto ungonā hande erevi jo te tapa na ikava uje ere ora. <sup>8</sup> Eto ari erevi ungonā ava ke ngahia na ae rate enana enda Macedonia ta hande embomeni ta ari vahai aingeko amo ungonā osa arina avote avo be kesi uje ere ona. <sup>9</sup> Eto Bada Iesu ta ari avo be hotembevujo, amina uhu i ta mihie hajae vajae embo be ena te ari avo toto enda ta veto ungoembo hoivo ena, amo ungonā aita donda embo ava ena. <sup>10</sup> Eto ari ainge avo ungonā ava oje kahihe erena eto jua mahu ta ungonā kihi

hande ikasi ijieva avo ikiheva <sup>11</sup> avoeto ari avo evujo inono ai, eto ungota jota heka eto hande inono ta evujo irae ai.

<sup>12</sup> Eto ungota uje doinge ikasi hotembiheva amo aravorate ungota degi doinge mihirou kito avo kaheketo hande ikihirovo God na kito aravora aisuja. <sup>13</sup> Eto unгона donda ambu embopo ta degi hande pete iketo ungo be ambu ava ke ae rate ungo mine omba eto inono inono eto irova erena. <sup>14</sup> Amita be amo erevira, eha oroho emo ungota degi donda mihia eto enana ta degi amo donda irae avoeto osaga erekogora te ambota amo unгона osaga kogurovo enanana ungo hondate aisora, eto ari ainge aisora amina ungota irari inono inono aisuja. <sup>15</sup> Ke ainge amo God ta ke ta einge kajari mihia, “Eto donda be peni vahai kahumbeto umbuna embo amina donda mamou ururao eto donda be isapa kahumbena embo amina donda ambu embo ae rate inonota donda embopo ea.”

### *Titus da Corinth ta ikeo pambuna*

<sup>16</sup> Eto nau hotembari peni vahai amo ungota degita mihia ainge dombo Titus ta hotembari amo ungota degi ta avo kogue God ta degi osa be ere ona. <sup>17</sup> Eto dagona Titus na da Corinth ta pambaja ke ijiera te amita jo tapa avo degi ungota ta avoeto jo tapa na pambasi uje ere ua. <sup>18</sup> Eto ungota namei vahai ikaro Titus ga pambaja ikehera amo Keriso ta duru javotoho hande ari embo avoeto ekalesia tapa na kogue jakeka eagora. <sup>19</sup> Eto God ta degi usasa te jakeka te pambaja donda ambu embomeni avo

jo oi koro na hondate asi uje isapamane ereora, pure avo hondate ue dagoga vahaita aja ekalesia embomeni na siriketo ikea amo embo nei mane rate namei ke ehera vahai avora. <sup>20</sup> Eto koro peni vahai be hande ere ovora avo humbuto pambuto embota hande ikasora avo embo na simba ari sapura ke eagora. <sup>21</sup> Avoeto dago daingeto Bada ta tihi ta eto embota tihita ari javotoho pere aisora avoeto ke ijie nununga ere ora.

<sup>22</sup> Eto ungo humota eaguja ungotenau namei nei amita pure amo jo tapa na tunga iketo pure uoi dago ere kogovora amite tapa ikaro pambasuja. <sup>23</sup> Eto ungo kogova amo Titus amo nau pure vahai embo amina ungo avoembo ungota degi pure ere ua eto ungota namei heriso ekalesia ta javo ta pure javotoho eagora amina Keriso otohū eagora. <sup>24</sup> Avoeto dagota humota ari te ke be ari te amo ungota degi ta avo ekalesia tapa na kito ungo ke be ara embo einge erevi ungonā kito osa ue pekihe umbuvujo.

## 9

### *Namei kamei hondate ari ta ke*

<sup>1-2</sup> Eto ungo God ta embomeni hondate asi tunga ikihe miheva amo na mahu kogona te teho ere kajihena. Eto ungota hande asi tunga ikava amita ke amo da Achaia embomeni ta degi nanena ke einge eo ingia, “Da Corinth ekalesia na jua mahu amina donda ambu embopo ta hande ikasi sirikea,” ke ainge amo nanena ungo jakeka ue ijio da Achaia embomeni na ingito hondate asi uje ea. <sup>3</sup> Avoeto ungota namei kamei ikaro ungota degi pambasora amo dagona

ungota ari avo jakeka eagora avo dagota ke avo huti mane aisuja avoeto ikaro pambasora be ikevujō kiore. <sup>4</sup> Avoeto nanena ungo humota ue ke eagona avo enda Macedonia embomeni na namote pambuto ungonā hande ikasova avo nununga ae amo koguroro ungotē namote tapa me kesora. <sup>5</sup> Avoeto ungonā hande ikasi oje ueva avo dago pambae mihiroro ungotā namei kamei na pambuto ungo hondate ururoro nununga avote avo hotembihe erena. Eto hande javotoho aisova amo engekari ta hande mane rate ungotā ujeta hande avoeto nununga aisova.

<sup>6</sup> Eto ke erevi ungo jeneambu avojo, eto embona ve heriso urasuja amo be isapa humbasuja eto embona ve isapamane urasuja amo be isapamane humbasuja. <sup>7</sup> Eto embo vahai vahai amita jota ngahia mihirou penunu au jo te tapa ikae aisuja amo sapura ra te embota jo ta doinge ikasuja avo siriketo osa osa te tapa ikasuja amo God na kito osa aisuja. <sup>8</sup> Eto God na ungotā degi javotoho ari iketo kane ari avo iraera te God na ungotā degi donda rete ari tapa deire avo inono iroja simba ururou ungonā pure jajavotoho nei do aisi uje aisova amo God na humbuto nei amita hamota ikasuja. <sup>9</sup> Eto God ta ke ta amo einge kajari mihia, “Eto donda ambu embopo ta degi hande embo ena avoeto amita ari javotoho avo daroho iresuja,” eto ke ainge mihia.

<sup>10</sup> Eto God na ve urari embo ta degi ve ikeoi humbuto ve uraguja eto pure ta be amite tapa ikeoi humbuto indagora avoeto ungonā ari jajavotoho tapa do do aisi uje aisova amo God na hondate ari ikau humbuto ururovo peni

be aisuja. <sup>11</sup> Avoeto ari javotoho do kito asi uje aisova amo God na ikau humbuto hande embomeni be ari haite aisova, amo unгона hande ikavo dagona humbuto embo nei ta iki-hiroro embo isapamane na God osa ue jakeka aisora. <sup>12</sup> Eto ungota hande ikasova amo God ta embomeni ta ujeje avo pere mane rate God ta degi osa kageni ari pambaguja avoeto ikasova. <sup>13</sup> Eto ungota hande ikasova aita amo ungota hande ta tunga enana ta degi eto embo tapa ta degi ere ikiheva amite eto ungo Keriso ta duru javotoho avo hamo na pere mane rate jo te tapa ambo ambo ereova amite tapa avo embona kito God jakeka aisora <sup>14</sup> eto God ta hondate ari isapamane ungota degi ikehei umbeva avo God ta embomeni na kito ungo jo tapana osa ue ungoembo pari aisora. <sup>15</sup> Eto God ta hande pajire be avo kogue kore ue God osa ere ora.

## 10

### *Paul ta osaga*

<sup>1</sup> Eto na Paul ke nau avo ungota degita ere kajihena kivujo. Eto embo na ke eagora amo na ungotе mihie na ke embo mane rate na ungotе irae amo ke ngahia na eto ke peni be eagona ke ainge eagora te na Keriso ta jo ari eto tunga humbari na ungota degi penunu erena amo erevira. <sup>2</sup> Eto ungota embo nei uhoho amina ari nau eto ke nau amo teho enda embota ari te ke te ra ke ainge eagora avoeto na ungota degi pambuto ke ngahia be amina ke sapura avo haekasona avoeto ungo simba evujo <sup>3</sup> eto ke be

amo ungotena enda ta mihie ari sasapura ta degi isoro ere orate amo enda ta isoro mane. <sup>4</sup> Eto enda ta ki emi amina isoro ae rate uhu ta ki emi sovera te amina Satan ta tihi jigari ta degi isoro ereora amo erevira <sup>5</sup> eto ke, eto ari deina au God ta kiari au sapura aisuja amita degi isoro eto embo ta hotembari tapa togeto humbuto eagore Keriso ta ke agi eagora <sup>6</sup> eto ungo jo hapereketo dagota ke agi aisova kito ungota peive ari do mihia avo kito hana kiari ikaro kogurovo irae aisuja.

<sup>7</sup> Eto ke erena emo asavi avo mane ingesova te ke ta susu be avo ingihe be kivujo. Eto embo amuna dago Keriso ta tohora ke ainge aisora embo amina dagote tapa ainge dombo Keriso ta toho ke ara erena. <sup>8</sup> Eto dagona ungo taro veava Bada na ikae rate ungo jigoro ereva Bada na ikena eto na pure avo ana Bada na ikena avoeto na ke ijie me mane kesona te pure avo aisona <sup>9</sup> eto na ahari ta ke ngahia be na ere kajihena amo ungoni kito joru ava kajae rate <sup>10</sup> embo nei nei na ke einge erera, “Paul na ahari ta ke ngahia na eriate ei ta irahija amo ke ngahia eria aingeko amo mane aehija te eita puvuto gamo ke ijirou ungotene mane ingesora,” ke ainge eagora te <sup>11</sup> ke ainge ari embo amina ke erevi hotembeto kioja erena. Eto ahari ta kajihone kiagova ainge dombo pambuto ungota tihi ta heteto ke ngahia be na ano ingesova.

<sup>12</sup> Eto embo nei nei na ungo oenga, “Na, na” ijiroro ungoni humota ava eagora avo dagona enana te dagote ari vahaira ke ainge avo mane aro ingesova te enana na God ta ari avo kogue

ae rate enana ta ari avo ungo oenga heka ereora avoeto ari ainge amo sarika ue ere ora. <sup>13</sup> Eto dagona ari aingeko avo mane aisorate God na pure mahu ikari avo kogue ke aisora. Eto God ta pure ikena amo ungota degi eagora vahai avora. <sup>14</sup> Eto dagona Keriso ta duru ungota degi ikeo umbava avoeto dago ungo simba ere ora te dagota tihi jigari ta hane amo dembeto pambaera. <sup>15</sup> Eto embo nei na God ta pure eaguja avo kogue dagona ari ke mane eagora, te dagota uje amo ungonu God humota ari avo pajihirou dagona kito pure neite neite ungota degi ururoro pajito <sup>16</sup> inono au dagona ungota enda hane oihota embo nei nei mihera amita degi God ta ke hande aisora, eto enda nei donda ve mahu urari aita dagona mane urasora te enda eha donda ve urae aita pambuto ve urasora. <sup>17</sup> Eto God ta ke ta einge kajari mihia, “Embo na ‘Na, na’ mane aisuja te Bada avoembo, ‘Na, na’ aisuja.” <sup>18</sup> ke amita be amo embona umo oenga, “Na, na” ijirou Bada na kito ke be ke mane aisuja te Bada na umo oenga kito ke be aisuja.

## 11

*Paul ta ke te ahe poekari sokova embomeni amita ke te*

<sup>1</sup> Eto siro sapura ari embo na keko ke isapa aisona amo ungo ingovote? Eto na ere kogona amo ungo ke ano ingesova, avo ere kogona. <sup>2</sup> Eto God ta hotembari vahai avo nanena hotembihe ungo amo embona pegene humbagora segigi ue mihovona. Eto ungo ekalesia amo Keriso ta kerari avoeto na kakara ta mamu aingeko eto

ungo tongopa ambu teho javotoho na mihirovo nanena ungo Keriso ta degi ikasona. <sup>3</sup> Eto o koso o na evohu Eve ta degi ke sokova na enu sapura ta vena ainge dombo ungo embota hotembari sasapura na aro ungota siro sapura au amo Keriso osa ari te humota ari te avo toto pambuova simba ue mihovona. <sup>4</sup> Eto nanena kogona amo Iesu dagona humbuto puvua avo mane rate Iesu nei amite Ahihi dagona humbuto puvua avo mane rate ahihi nei amite eto duru javotoho hande uera avo mane rate duru nei humbuto hande eagora avo ungoni ingihe aita porere mane pambuova. <sup>5</sup> Eto apostle sokova ungota degi puvuto ke eagora avo embo peni, na isapa ke ainge avo nanena mane aisona <sup>6</sup> eto na enana aingeko ke gamo na hande ari embo manera te nau degi ta amo God na kiari peni vahai be ikena amo ungoti mihie ke hande ehene ingihava avoeto ke avo ungoni ke be ari inonora.

<sup>7</sup> Eto na ungota degi pambuto God ta duru javotoho hande uena amita mine na umbae ari amina ungo jigene eriheva te ainge uena amomo ari javotoho umahanete mo ari sapura umahane? <sup>8</sup> Eto na ekalesia nei nei amita koro avo pegene arako eto jigama ue ungota degi pure amo uena. <sup>9</sup> Eto na ungoti mihie amo nau ujeje tapa do puvuna amo na ungota degi bouka nei do ikae rate ungota namei kamei enda Macedonia ta eto puvua amina na undua eto na ungota degi ombari asari ta eto bouka ikae mihovona ainge dombo bouka mane ikasona. <sup>10</sup> Eto Keriso ta ke be amo nau jota mihia avoeto amita hamota ke erevi erena amo enda Achaia ekalesia na ke nau



erevi mane haekasora. <sup>11</sup> Eto na ungo osa ae avoeto koro umbae ari ke ijie hotembihevete? Na ungo osa ere ona amo God na ere kogua <sup>12</sup> eto ke sokova ari embopo na nau pure vahai embo ke ijie koro humbasi pure eagora avoeto na ke avo haekihe na ungota koro mane umbasona. <sup>13</sup> Eto embo aingeko amo apostle be mane rate pure sokova ue Keriso ta apostle ke ijie eagora <sup>14</sup> eto na enana ta ari avo kito jeneki honeki mane aisona te enana ta ari amo Satan na Anera usasa te ke ijie isa eaguja. <sup>15</sup> Avoeto amita pure ari embopo na amita ari vahai avo ue ari jajavotoho ta pure ari embopo ke ijie ke sokova na eagora. Avoeto enana ta pure eagora amita iji tutumota amo God na hana kiari ikau kesora.

*Eto Paul na osaga kina ta ke*

<sup>16</sup> Eto na ke ehako erena amo na siro sapura ari ke mane aisova te siro sapura ari embo ta ke ingito ingarako uore eagora aingeko simba ururovo ke nau avo ane. <sup>17</sup> Eto ke nau avo “Na, na” ijirono ingesova amo Bada na mane aehija te na siro sapura ari embona keko aisona <sup>18</sup> amo enana apostel sokova na enda embo tapa na enana ta ari amita ke eagora aingeko nanena aisona. <sup>19</sup> Eto unгона dago tupo embora eagova te siro sapura ari embomeni ta ke sau be ingagova <sup>20</sup> amo ungo tupo embo sira ove apostel sokova na puvuto ahe poekihere unгона ke agi ue kajumba ue ke tapa avo agi ue age ungota na timbutu indarako ereova. <sup>21</sup> Eto dagona ungota degi kihi pambuto ke sokova na ahe poekehene ungo na na kajumba ue age ungota na timbutu

indarako aheva avo nau degi ta me kiari dombo be ra. Eto na siro sapura ari embo na keko ijie ke erevi aisona amo enana na ke ijie “Na, na” eagora amo dagote tapa na ke amo “Na, na” ari inonora. <sup>22</sup> Eto enana amo Hebrew embopo rete? Namote tapa Hebrew embora, eto enana amo Israel embopo rete? Namote tapa Israel embora. Enana amo Abraham ta meniundi rete? Namote tapa Abraham ta menira. <sup>23</sup> Enana amo Keriso ta pure ari emboporete? Namote tapa Keriso ta pure ari embora te ungo ere kogova amo nau hotembari javotoho avo toto “Na, na” ijie erena te nau ari tapa amina enana dembari avoeto erena amo pure ngahia eagona eto nei amo na tipura ta ikagora eto nei amo na teore memenga kiagona eto iji nei nei amo na pehari ahumpa eagona <sup>24</sup> eto Judea embo na iji tapa 5 rate iji vahai vahai amita jo ta na ejembeto tea amo tapa 39 ainge toruera <sup>25</sup> eto iji 3 amo ituha na toruera eto iji vahai amo koro na toruera eto iji 3 amo na e nga ta pambuhone e nga teto pejeo, iji vahai amina na iji vahai mume vahai eva ta daveto pambua. <sup>26</sup> Eto na enda tapa ta isa eagona degi aita amo umo vuenga ta degi osaga kiagona eto degi ta embo teto pegene eagora aita osaga kiagona eto enda nau embomeni ta ingeni ta enda nei embomeni ta ingeni ta osaga kiagona eto da jota eto degita eto eva hamota pahue osaga kiagona, eto nei amo nau namei ke eagora amita degi osaga kiagona. <sup>27</sup> Eto nei amo na pure ngahia ue evae eagona, eto nei amo indari te umo te na beuje uoi teho mihovona eto nei amo bo ambu eto jajemote avo kiagona

<sup>28</sup> eto ari tapa amita hamota amo iji vahai vahai ekalesia avo hotembu hotembu ue iragona, <sup>29</sup> eto ekalesia embo vahai na ivo ambu eaguja amo na osaga kiagona, eto embo vahai na engekari ta veaguja amo na osaga kiagona.

<sup>30</sup> Eto na “Na, na” asona amo nau sovera ta ke avo mane aisona te ivo ambu ta ari avo ungo na kiagova ari vahai erevi aisona. <sup>31</sup> Eto ke erevi aisona amo ke be pere avo Bada Iesu ta Mamo God daroho jakeka aisora amina ere kogua avoeto ke emo ke be pere erena. <sup>32</sup> Eto na da Damascus aita pambuto mihio King Aretas ta gavana na na andito humbasi amita isoro ari embopo ikenu da tapa joeketo mihio <sup>33</sup> nau namei kamei na na humbuto handija peni vahai aita juruketo otohō ta ikeo da arahata veto kiae pambua.

## 12

### *Paul ta joremba ke ena*

<sup>1</sup> Eto nanena, “Na, na” ijie ungota degi ke ehako anote? Eto amita heta javotoho mane puvuresuja avo kogona te Bada ta ke nau degita harikihoi ehureta kiarako uena avo ungota degi ano ingivujo. <sup>2</sup> Eto Keriso ta embo vahai nanena kiari amo jua 14 irae ehija amita ihikari ta embo vahai amo God na humbuto uhu i be ta pambuna amo hamote visi te na pambunute hamo visi pehena pambunu amo na kiaera te God na vahai kina. <sup>3</sup> Te embo vahai amo hamote rete hamo ambu re amo God na vahai kina <sup>4</sup> embo amina uhu i God ta irari degi aita pambuto ke jajavotoho avo ingina te God na haekari avoeto

embo na ke avo mane harikasuja <sup>5</sup> eto na embo amita javota nane ke aisona te “Na na” oenga amo ivo irae ke avo aisona. <sup>6</sup> Eto na ke nau be avo humbuto, “Na, na” ahena amo ke be avoeto na me mane kiaehena te na embo peni rete isapa re avo embo ta hotembari na aerate nau ke te arite avo embona kogue na embo peni rete embo isapa re avo ara uje ere ona avoeto nanena, “Na, na” mane aisona.

<sup>7</sup> Eto na degi javotoho aita pambuto ari jajavotoho neite neite kehena avoeto na embo peni ke ijie one God na nau degita ambure vahai ikehei Satan ta pure embo na arako kaikari ereona avoeto na embo peni ke mane eagona <sup>8</sup> avoeto na ambure kaikari eagona avoeto iji 3 ainge Bada na humbau irae aja pari uenate <sup>9</sup> Bada na ke mine einge ijija, “Eto na no ambure avo mane umbano irae aisuja te iji vahai vahai na umo hondate aisona amo inonora te umo ivo ambu embo ururo ivo nau avo no degita ikano peni vahai aisuja,” ke ainge ijija avoeto Keriso ta ivo avo nau degi ta iroja ivo nau irae avoeto tunga javotoho ue, “Na, na” aisona. <sup>10</sup> Eto ke avoeto nau ivo ambuari embo ta isembari, hamota tari, ahumbari neite neite Keriso ta javota kiagona avoeto aita amo nau degi ta sovera ari puvaguja.

*Paul na Da Corinth embomeni avoembo osaga kina*

<sup>11</sup> Eto na siro sapura ari embo na arako ue ke erevi ere kajihena amo ujekari ungota avoembo ereona te ungonā osa ue ke be aheva amo na ke einge emo mane kajaehena te ungo be kivujo, ungota apostel sokova amo peni, na isapa arako

manera. <sup>12</sup> Eto na apostel be amita hajire pepeni neite neite avo ungota degi one unгона iji koso be kogueva <sup>13</sup> eto nanena ungo avo ekalesia nei uhoho amiga inonora ainge ene unгона kogovete? Eto kogueva amo na ekalesia nei uhoho amita degi koro humbuhenate ungo nei nei amita degi amo koro umbae amina ehei inono ae ari ke erevete? Avoeto ari nau kito hotembeto tovujo. <sup>14</sup> Eto na ungota degi iji heriso mahu pambuhena te eha emo ehako pambuto ungota degi umoro ue unгона ari ngahia nei do ava ke mane aisona. Eto na ungota degi pambuto humbasi uje ereona amo ungota koro mane rate ungota osa ari. Eto erena amo meni isasaraho na enanata e mamо mane unduagorate emamo na meniundi simba ue unduagora. <sup>15</sup> Avoeto na ungota degi ta pambuto ungo hondate ururono nau koro te hamo te amo jigama ano irae aehija. Eto na ungo osa peni vahai ereona avoeto unгона na mine osa isapa be aheva.

<sup>16</sup> Eto na ungota degi pambuto mihio na undiheva aita osaga nei do hambae rate embo nei na eagore ingagona amo nanena ungota degi pambuto ke gamo poekari ke na ene ingihava <sup>17</sup> amo ke hande ari embomeni ungota degi ikehene pambuhera amina ungo ke gamo na poekae <sup>18</sup> eto na Titus pambaja ijie ungotenau namei vahai amiga ikehene pambuhija avoeto Titus na ungota degi ke gamo na poekae rate unгона kogova amo Titus te namote amo ari vahai ahihi vahai amina eagora.

<sup>19</sup> Eto dagona ke ere kajihera avo unгона dago embo jajavotoho ke ava kajari ke ijie ere

hotembihevete? Eto nau namei kamei, ke amo ainge ae rate God ta tihi eto Iesu ta javota ungo avoembo ke emore ere kajihera. <sup>20</sup> Eto na ari vahai erevi joru ere ovona amo na aita pambuto ungota irari nei avo kogurono ungonana na kogue amo ngahia embo ke aisova avo na joru ere ona. Eto nei amo jujunete, embo nei ta donda uje ari te humote, embo kahekarite, javo ari sapura arite, ke sokova hande arite viso orongote, vasiri siosao arite, tapa avo aita hambanote avo na joru ere ona. <sup>21</sup> Eto na ungota degi pambasona amo ungo nei nei na tiha paiha te sesena sasapura te hamo ta ujeje sasapura neite neite amo mahu ere ovova avo toae avo na God ta tihi ta me kesona avo joru ere ona.

## 13

### *Kogue irivujo*

<sup>1</sup> Eto na ungota degi iji heriso pambuhena eto ehako pambasi ere ona. Eto ungota degi ari sasapura do mihia amo kiari embopo heriso eto nei heriso nei vahai amina pehumba ururoro ke be harikasova <sup>2</sup> avoeto na mahu ungote mihie ijiena eto ehako na ungote irae rate ehako erena avo ungo be ingivujo, na ungota degi pambasona amo ari sasapura mahu te ehaha te avo mane toasona bera <sup>3</sup> eto ungonana Keriso Paul ta degi ke eagoite aere ainge eagova ungo be kiagova ari ainge amo aisona. Eto ungo kogova amo Keriso ungota degi ivo ambu ae rate sovera eaguja <sup>4</sup> eto ungo kogova amo Keriso ivo ambu enu ji atahuta tea te eha oroho emo God ta sovera

avoeto iraguja. Eto Keriso na ena ainge dombob  
dagota ivo irae rate dago aita pambuto pure  
ururoro unгона God ta sovera avo be keisova.  
5 Avoeto ungo Iesu humota ere ovete aere avo  
ungota jo sirikevujо. Eto ungo Keriso ta toho be  
kito amo Keriso ungotа jo ta iresuja avo kesova.  
6 Eto dago amo Keriso ta toho be avo unгона  
be kiagova uje ere ona. 7 Avoeto ungo vasiri  
jajavotoho pere ava uje ue God ta degi pari  
ereona amo embo na dago kito ahe poekari embo  
jajavotohora ke ainge ara ae rate dago embota  
tihita javotoho rete sapurare avo mane aisora te  
ungo avo jajavotohora uje ere ora. 8 Eto ke be  
amo dagona mane haekasora te sigeto pambaja  
pure ere ora. 9 Eto dagona ivoambu aisora te  
ungo na ivo aisova avo peni bera te unгона  
ari jajavotoho na pere inono ta aisova avoeto  
dago ungoembo pari ereora. 10 Eto Bada na  
nane ungo tihi jigihio kito nau degi ta sovera ari  
ikena amo na ungo tano veava ikae rate ungo  
jigono ereva ikena eto na ungotа degi pambae  
eita mihie ke erevi ere kajihena amo unгона kito  
jo hapereketo mihirovo pambuto ungotа degi  
ke ngahia na mane aisona avoeto ke erevi ere  
kajihena. 11 Avoeto nau namei kamei, ungotа  
degi orere re erena, javotoho na pere irivujо,  
eto nau ke erevi ehекeto kivujо, eto hotembari  
vahai evujо, eto pekata irivujо. Eto osa arita,  
peka ari ta God ungotа degi iresuja. 12 Eto otohu  
ari amina mune tavo mine ara evujо. 13 Eto God  
ta embo ototohu eita mihera amina ungo ere  
pekihera 14 eto Bada Iesu Keriso ta hondate ari

God ta osa ari eto Ahihi Otohu ta vahaita ari ungo  
tapa amita degi ta iresuja.



**God Ta Duru Javotoho**  
**The New Testament in the Ehija dialect of the**  
**Orokaiva language of Papua New Guinea**  
**Nupela Testemen long tokples Orokaiva Ehija long**  
**Niugini**

Copyright © 1988 Wycliffe Bible Translators, Inc.

Language: Orokaiva Ehija (Orokaiva)

Dialect: Ehija

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-22

---

PDF generated using Haiola and XeLaTeX on 11 Nov 2022 from source files dated 7 May 2021

4dba26bb-8ba0-5684-b118-fc0b29d80cd2